

每週經課朗誦經文(巴克禮漢羅/教羅)2014/11/23

共同經課 - 1 以西結書三十四章十一節~十六節，二十節~二十四節

11 因為主耶和華 án-ni 講，看 ah，我，我 beh 本身 chhē 我 ê 羊，來 chhē-tiòh 伊。12 牧者 tī 羊群四散 ê 日，怎樣 chhē 伊 ê 羊，我也 beh 親像 án-ni chhē 我 ê 羊；chiah-ê 羊 tī 密雲烏暗 ê 日，四散到 tàk 所在，我 beh tùi-hia 救 in tò 來。13 我 beh tùi 列國中 choā in 出，tùi tàk 國 ê 內面聚集 in，chhoā in tò 來 in ê 本所在；也 beh tī 以色列山 chiah-ê 溪邊，境內一切 thang khiā 起 ê 所在，來養飼 in。14 我 beh tī 好好 ê 草場養飼 in，in ê 羊寮 beh tī 以色列高位 ê 山；in beh tī 好好 ê 羊寮內倒 teh 睏，也 tī 以色列山肥 súi ê 草場食草。15 主耶和華講，我 beh 本身養飼我 ê 羊，hō in 倒 teh 睏。16 失落 ê 我 beh chhē 伊；受趕逐 ê，我 beh chhoā 伊 tò 來；受傷 ê 我 beh 包伊；破病 ê，我 beh 醫治伊；獨獨肥 ê，勇 ê，我 beh 除滅伊，也 beh 秉公養飼 in。20 所以主耶和華對 in án-ni 講，看 ah，我本身 tī 肥 e 羊 kap 瘦 e 羊 e 中間，行判斷。21 因為 lín 用身軀，用肩頭 khoeh-in，用 lín ê 角觸破病 e，致到 hō in 四散 tī 外面。22 所以我 beh 拯救我 e 羊群，無 koh 做受搶 e 物；我亦 beh tī 羊 kap 羊 e 中間行判斷。23 我 beh 設立一個牧者，照顧 in，伊 beh 養飼 in；就是我 e 奴僕大衛；伊 beh 養飼 in，做 in e 牧者。24 我耶和華 beh 做 in ê 上帝；我 e 奴僕大衛 beh tī in ê 中間做首領；這是我耶和華講 e。

共同經課 - 2 詩篇一百篇

1 感謝 ê 詩。1) 全地 tiòh ñg 耶和華出歡喜 ê 聲。2 Lín tiòh 歡喜 ê 心服事耶和華，唱歌來到伊 ê 面前。3 Lín tiòh 知耶和華是上帝；咱是伊創造 ê，咱亦是伊 ê；咱是伊 ê 百姓，亦是伊草場 ê 羊。4 Tiòh 用感謝入伊 ê 門，用 o-ló 入伊 ê 院；Tiòh 感謝伊，o-ló 伊 ê 名。5 因為耶和華是好；伊 ê 慈愛到永遠；伊 ê 信實到萬世代。

共同經課 - 3 以弗所書一章十五節~二十三節

15 因為 án-ni，我既然聽見 lín 中間 tī 主耶穌 ê 信，kap 顯出 tī 眾聖徒 ê 仁愛，16 就為 tiòh lín 感謝無 soah，祈禱 ê 時 siàu 念 lín；17 求咱 ê 主耶穌基督 ê 上帝，榮光 ê 父，賞賜 lín 智慧啟示 ê 神，來深 bat 上帝；18 lín ê 心目得 tiòh 光明，hō lín 知伊召人所 ñg 望 ê 是怎樣，伊 ê 業 tī 聖徒中榮光 ê 富有到怎樣，19 koh 知伊 ê 權能 ñg tī 咱 chiah-ê 信 ê 人大到怎樣，20 照伊前所 bat 行 tī 基督大權能大氣力 ê 功用，hō伊 tùi 死人中 koh 活，tī 天裡坐伊 ê 大 pêng，21 poâⁿ 過 lóng 總辦正事 ê，掌權 ê，才能 ê，治理 ê，kap 一切所號 ê 名，m̄-nā tī 今世也 tī 來世，lóng poâⁿ 過遠遠；22 koh hō 萬項有降服 tī 伊 ê 腳下，koh 將伊做管萬有 ê 頭，來賞賜教會；23 教會是伊 ê 身軀，伊所充滿 ê；伊也是用萬有充滿萬有 ê。

共同經課 - 4 馬太福音二十五章三十一節~四十六節

31 當人子 tī 伊 ê 榮光，kap lóng 總 ê 天使來 ê 時，伊 beh 坐伊榮光 ê 座位，32 聚集萬邦 tī 伊 ê 面前；伊就 beh 分別 in，親像牧者分別綿羊離開山羊。33 將綿羊 hē tī 伊 ê chiàⁿ-pêng，山羊 hē tī 伊 ê tò-pêng。34 Hit 時王 beh kā chiàⁿ-pêng ê 講，Lín tùi 我 ê 父得 tiòh 恩典 ê，進前來承接國，就是 tùi 創造世間以來 kā lín 備辦 ê。35 因為我 iau，Lín bat hō 我食；我嘴乾，lín hō 我 lim；我出外，lín hō 我 toà；我 thng-pak-theh，lín hō 我穿；36 我破病，lín 看顧我；我 tī 監裡，lín 來 chhē 我。37 Hit 時義人 beh 應伊講，主 ah，阮甚麼時看見你 iau，來 hō 你食？嘴乾，來 hō 你 lim？38 甚麼時看見你出外，來 hō 你 toà？thng-pak-theh，來 hō 你穿？39 甚麼時看見你破病，á 是 tī 監裡，來 chhē 你？40 王 beh 應伊講，我實在 kā lín 講，Lín 既然行伊 tī 我 ê 兄弟至微細 ê ê 一個，就是行伊 tī 我。41 Koh beh kā tò-pêng ê 講，Lín 受 chiù-chó^e ê，tiòh 離開我，入永遠 ê 火，就是為 tiòh 魔鬼 kap 伊 chiah-ê 使者所備辦 ê。42 因為我 iau，lín m̄-bat hō 我食；我嘴乾，lín m̄-bat hō 我 lim；我出外，lín m̄-bat hō 我 toà；43 我 thng-pak-theh，lín m̄-bat hō 我穿；我破病 kap tī 監裡，lín m̄-bat 看顧我。44 In 亦 beh 應講，主 ah，阮甚麼時看見你 iau，á 是嘴乾，á 是出外，á 是 thng-pak-theh，á 是破病，á 是 tī 監裡，來無服事你 ah？45 伊就 beh 應伊講，我實在 kā lín 講，Lín 既然無行伊 tī chiah-ê 至微細 ê ê 一個，就是無行伊 tī 我。46 Chiah-ê 人 beh 去入永遠 ê 刑罰；若是義 ê 人人永遠活。